

FRETILIN IHA PARLAMENTO NACIONAL
KOMUNIKADU DE IMPRENSA

Díli, 21 dezembru 2018

Bankada FRETILIN vota kontra proposta governu nian atu tau verba \$350 miloins iha Orsamentu Jerál Estadu tinan 2019 hodi sosa asaun iha Greater Sunrise tanba prosesu ba akizisaun ne'e nakonu ho segredu, laiha transparénsia, laiha konsulta ho órgaun soberanu sira.

Prosesu akizisaun ne'e rasik viola Artigu 70 (Partidu Polítiku sira no direitu ba opozisaun) husi Constituição da RDTL, ne'ebé ko'alia kona-ba direitu partidu polítiku sira nian atu halo opozisaun demokrátika, no direitu atu hetan informasaun regulár e direktamente kona-ba lala'ok asuntu prinsipál interese nasional nian.

Prosesu akizisaun ne'e mós viola Lei das Atividades Petrolíferas, liuliu Artigu 22. Governu nia desizaun atu altera lei ida ne'e hodi lejítima aktu ilísitu iha prosesu sosa asaun iha Greater Sunrise, la'ós medida ne'ebé loos no kontraria ho ita nia norma atu respeita lei no Constituição.

Horisehik, hafoin representante sira husi Bankada FRETILIN no PD ezije informasaun sira ne'e durante debate orsamentál, finálmente Governu decide fahe dokumentu balu relasiona ho prosesu sosa asoins sira ne'e.

Ministru Agio Pereira, ne'ebé ezerse interinamente funsaun nudár Ministru ba Petróleu no Rekursus Minerais, deklara katak dokumentu sira ne'e sei fornese estudu viabilidade sira no dokumentu sira seluk ne'ebé suporta Governu nia desizaun atu asume risku sira iha investimentu ba Greater Sunrise.

Representante sira husi Bankada FRETILIN simu ona USB ida husi ofisiál governu nian, ne'ebé mai ho dokumentu 5 (lima) no vídeo 3 (tolu).

Maske Bankada FRETILIN apresia desizaun Governu nia esforsu atu kumpre sira nia devér hodi respeita provizaun iha Constituição da RDTL kona-ba direitu partidu polítiku sira nian atu hetan informasaun, infelizmente, USB ne'e la inklui dokumentu ruma ne'ebé bele duni responde ba deputadu sira nia preokupasaun.

Dokumentu sira ne'ebé mai iha USB ida ne'e inklui esplikasaun husi Timor GAP no estudu rua husi kompañia konsultora ida naran Acil Allen Consulting. Dokumentu husi Timor GAP la inklui informasaun foun, maibé iha informasaun sira ne'ebé ita hatene ona liu husi diskusaun ho ekipa negosiasaun no seminar balu ekipa ida ne'e halo.

Dokumentu rua huai Acil Allen Consulting ko'alia kona-ba poténsia implikadora husi Projetu Tasi Mane ba ekonomia Timor-Leste nian (prodús iha Agostu 2016); no impaktu ekonómiku husi Greater Sunrise (prodús iha Juñu 2017). Estudu sira ne'e uza asumsaun hotu-hotu (hanesan ezemplu, presu minarai) husi Timor GAP hodi nune'e bele konklui ho rezultadu ne'ebé Timor GAP hakarak.

Laiha dúvida katak estudu ida ne'e bele kontribui ba ita-nia análize antes ita foti desizaun importante ida hanesan ne'e. Maibé Bankada FRETILIN hatene katak, nein Governu, nein Timor GAP ho ANPM, iha ingénuidade to'o pontu ida atu aseita de'it rezultadu husi estudu ida ne'e.

Bankada FRETILIN fiar katak Governu sei iha tan estudu sira seluk ne'ebé presiza fahe antes ita to' o iha konkluzaun ruma. Projetu boot ida hanesan Greater Sunrise, ne'ebé implika kustu boot ba Estadu, ho dolar biloins barak e bele liu \$8 biloins ka ekivalente ho OGE tinan 5 nian, labele depende de'it ba estudu ida, husi kompañia konsultora ida iha Austrália.

Bankada FRETILIN hatene katak ekipa negociadora, Timor GAP ho ANPM, halo ona estudu sira seluk relaciona ho projetu dada pipeline ba Tasi Mane, hahú husi tinan 2008 até ohin. Tan ne'e Bankada FRETILIN hakarak bolu atensaun ba estudu balu hanesan tuir mai:

- Deep Gulf (Governu mak kontrata hodi halo estudu)
- Poten & Partners (Governu mak kontrata hodi halo estudu)
- Wood Mackenzie (Energy Research & Consultancy)

Karik Governu haluha atu inklui estudu sira ne'e iha USB, Bankada FRETILIN hakarak fó tan oportunidade ba Governu atu kompleta, o mais rápido possível.

FRETILIN hakarak nafatin buka dalan atu investe iha pipeline mai Tasi Mane hodi bele ajuda ita-nia desenvolvimentu no hametin ita-nia independéncia no soberania. Maibé FRETILIN mós la moris ho iluzaun katak investimentu ida ne'e la akompañadu ho risku boot ba nasaun, ne'ebé bele tau iha kauza ita nia independéncia no soberania

Nune'e, FRETILIN hakarak Timor-Leste tomak atu estuda no kompriende risku sira ne'e loloos antes ita foti desizaun.

Órgaun estadu nian ne'ebé foti desizaun tenke hatene risku sira ne'e no oinsá bele redús ninia impaktu. Atu hatene, ita presiza informasaun no Bankada FRETILIN, nudár representante Povu nian iha Uma Fukun ida ne'e, nafatin ezije Governu no ekipa negociadór atu divulga informasaun hotu-hotu kona-ba Estadu nia envolvimentu iha projetu Greater Sunrise, no kumpre provizaun iha Artigu 77 iha Constituição da RDTL.

RAMATA.

